



Cuira, ils 6 da settember 2022

Communicaziun a las medias

Chalender spezial da la famiglia Babulin

La Lia Rumantscha ha realisà in chalender cun dis spezials da la famiglia Babulin per uffants tranter 5 e 9 onns, nua ch'els inscuntran la famiglia gia enconuschenta da pliras publicaziuns. Per mintga di spezial dal chalender survegnan ils uffants ideas per zambregiar, giugar ed auter pli. L'entschatta fa il Di da la pasch ils 21 da settember.

Il Di da la pasch, il Di dal chaun u il Di da la scrittira da puncts – la famiglia Babulin ha in agen chalender che s'extenda sur plirs onns. Quel na mussa betg mo dis enconuschents sco Son Valentin, Pasca u Nadal, mabain er dis main enconuschents ch'èn tuttina fitg impurtants per ils Babulins. In pèr da quests dis ha la Lia Rumantscha accentuà e creà material correspondent cun bellas ideas per zambregiar, giugar ed auter pli.

L'entschatta fa il Di da la pasch ils 21 da settember. Quel di stat en il center il «far la pasch». Ils uffants sa fatschantan per exempel cun la dumonda co ch'els fan insumma la pasch e tge colurs e simbols da la pasch ch'i dat ed els survegnan in'Instrucziun per zambregiar craps da pasch.

Ils proxims dis impurtants per la famiglia Babulin:

Chalender spezial dals Babulins

Di dal chaun, ils 10 d'october 2022

Di internaziunal dals dretgs da l'uffant, ils 20 da november 2022

Di da la scrittira da puncts/da Braille, ils 4 da schaner 2023

Di dal cudesch, ils 23 d'avrigl 2023

Ils dossiers da quests dis sa chattan adina curt avant il di spezial sin www.liarumantscha.ch.

Il chalender spezial da la famiglia Babulin fa part da *kidsfits*, il program da famiglia da la Lia Rumantscha. Il program porscha en tut ils idioms ed en rumantsch grischun ina vasta paletta da products per pitschen e grond, infurmaziuns davart la bilinguitad, curs ed autras occurrenz per geniturs, tats e tattas e personas d'Instrucziun.